



Kamis, 17 Desember 2020

Ogen: Johanes 12:7



Ngelakoken Si Mehulina



Uga banci si eteh kai si me hulina ding en nggit guna ndalakenca? Nent uken kai si me hulina labo sada dahin si mesunah. Emaka lit nge lagu Karo judulna 'Persoalen ate ngena." Dua temanna, duana me huli, duana metami, duana seri ate jadina. Dua saja teman la mesunah nent uken apai si me hulina guna banci la salah pilih. Apai nari adi lit sepuluh si man pilih en. Tentu enggo reh serana guna nent ukenca, alu erbage pertimbangan-pertimbangan.

Menarik adi nggit kita erlajar arah ogen enda. Si minaki nahe Jesus eme Maria senina Marta turang Lasarus. Lasarus si ipekeke Jesus i bas si mate nari. Kutana i Betani deher Jerusalem. Rumah kalak enda me Jesus rusur kesilang adi IA ngelai i daerah Selatan (sekitar Jerusalem). Tupung Jesus reh ku rumah kalak enda maka Maria rusur kundul deher nahe Jesus guna megiken pengajarenNa. Adi Marta, ia megati kuskas nikapken pangan. Kai si lakoken Maria erbahanca maka ietehNa kai si bakal jadi man Jesus. Sabab man ajar-ajarNa jine lit telu kali si langlangna Jesus nuriken kematenNa. Tapi sekalak pe ajar-ajarNa labo angkaNa kai si ikataken Jesus.

Adi jelma nandangi mate kai kin si iperlukenna? Eme lit teman si ndampingi ia. Adi si oge Johanes 12 meriso akapna perban ietehNa IA nandangi isiksa ras iukum. Maria ngenca meteh kai si isuraken Jesus. Perbahen Maria i lebe-lebe Jesus eme si me hulina, ergan asa minak si amburkenna sebab e tandana iangka Maria kai si bakal terjadi man Jesus. Si me hulina i bas kegeluhen eme ndalanken kai sura-sura Jesus. Guna meteh sura-suraNa arus kita bagi Maria megiken Kata Dibata. Ibas geluhta sitep-tep wari pe kehadiran ras kepedulinta nandangi kalak sideban penting kal, bagi nina belas-belas perlu kal 'touch heart', touch body' sentuhan daging kula ras pusu h asangkan 'touch screen' ntah pe minak wangi.